

Hafniam est *Helsingora* & prope eam Arx Regia *Croneburgum* de qua infra, cui ab altera parte ultra Mare similis Arx *Helsingborch* cum Opido ejusdem nominis respondet. Ibi *Zelandia* & *Scania* prominentibus utrimque promontoriis ita prope coeunt ut vix parvi milliarii inter se relinquant Maris spacium quod *De Sund* vocatur. Ad hunc locum omnes naves Orientem versus cursum instituentes, velut ad centum coire & Regi vectigal percipere coguntur: cumque in utroque littore arx posita sit, Rex quando id necessitas postulat, suis in medio collocatis navibus, ita has fauces occludere potest, ut quantumvis etiam numerosam classem ab ingressu, vel egressu prohibere queat. Huc saepe uno die 200 saepe etiam 300 naves ex variis Europae partibus convenire contingit. Est & hic *Roeschildia* sedes olim Episcopi; ibi multorum Regum & Ducum insignia monumenta conspiciuntur: nunc autem ad tenuitatem perducta, quod cives urbium confici munitionibus soleant inolescere. Sub *Zelandia* autem sequentes sunt Insulae, *Amigria*, *Huena* sive *VVe Moenesland* in qua civitas *Stegoa* & plures aliae. Habet *Zelandia* unum Episcopatum cujus Praesul *Roeschildia* sedem antiquitus, ut diximus, habuit. *Scania* inter Regni Daniae Provincias magnitudine & opibus admodum insignis est regio, atque cum Suecia continens. Hanc alii *Scandinaviam* pro *Scandianam*, id est, *amoenam Daniam*, alii *Scaniam* atque alii *Scomigiam* dixere, vulgo *Seonen*. Plinius eam tum *Scandiam*, tum *Scandinaviam* vocat, sed in eo fallitur, quod *Insulam* esse putat *incomperta magnitudinis*. Sed Ortelius hanc Plinii *Scandiam* & *Scandinaviam* non *Scaniam*, sed eam Peninsulam esse, quae hodie tria amplissima Regna Norvegiam, Sueciam & Gothiam aliasque regiones comprehendit, autumat, ut supra quoque diximus. Undique cingitur haec Scania Mari, praeter unum Terrae brachium quod porrigitur in Boream, ac inde recurvatur in Orientem ubi Sueciae jungitur: sed intercedunt profundi saltus asperrimaeque rupes, per quas e Scania in Gothiam Sueciae partem iter agitur tam difficile, ut fere levius sit marino discrimine vitare terrestrem laborem. Regio Coeli beneficio, Telluris obsequio, Portuum & Emporiorum commoditate, maritimis opibus, Lacuum & Fluminum piscatione, venatione nobilium Ferarum, Auri, Argenti, Aeris & Plumbi inexhaustis venis, Opidorum frequentia, civilibus institutis nulli cedit beatæ regioni: unde & *Schondia* illi nomen mansit, teste Munstero. Haec quondam in duos ducatus, *Hallandiam* & *Blekingiam* divisa, nunc Praefecturas viginti tres & civitates quindecim complectitur. Ejus Metropolis est *Londa* sive *Londia* ubi Regni Archiepiscopus sedem suam fixit. Est etiam hic *Malmogia*, quae & *Ellebogen* dicitur, insigne Emporium & praecipua totius regionis civitas propter nundinas & frequentes negotiationes, quas ibi provinciales exercent. In Hallandia est arx *VVarburgum* altissimis Montium jugis superstructa. Eam a Suecis anno MDLXV captam & imposito praesidio munitam cum Daniel Ranzovius jussu & auspicio Regis Friderici secundi aëta obsidione premeret, ut tandem se dedere sit coacta, globo ex tormento aëneo per caput trajecto peremptus est an. MDLXIX vir virtutibus & laude bellica valde illustris. Adjacent huic Regioni Insulae *Landoe*, *Hannoe*, *Bornholm* Insula famosa in quatuor praefecturas divisa, & tres Civitates ac unam Arcem continens. *Gotlandia* in qua antiquum Emporium *VVisby* aliquando valde

Scandia.
Nomina.

Sinu.

Celi temperies
& Soli qualitas.

Urbes.